

國朝文類

二

國朝文類卷第二十

碑文

帝禹廟碑

鄧文原

至大辛亥紹興路重修帝禹廟成江浙行中書省平章政事臣某等遣使驛聞請紀其事饒諸樂石而以命臣文原制曰可顧臣庸陋嘗待罪詞林今又職司儒校敢不對揚丕顯式昭祀垂憲來今謹按史載帝即位會諸侯江南計功而崩因葬焉其事與記禮言虞帝南巡葬蒼梧者皆語相傳以久至於封泰山禪會稽則尤爲後世侈功好大者之論而非聖人崇德務本意也嘗以五服計其道里遐邇則會稽寔在要荒之外先王省方肆覲政教是敷非若御八駿樂觀游除道周衛而勤民于遠然帝自肇功疏鑿告成錫圭躬膺歷數年逾百歲矣猶不肯一日自暇逸以居於萬民之上則夫子所謂有天下而不與者豈非萬世之大訓哉厥初巨浸稽天民用昏墊執任已溺懋于奮庸天啓聖仁聲律身度勤躬胝胝以宣地利以奠民極功施無窮考禮報本匪越人所私爰自少康之庶子無餘始封而命祀蓋少康距帝僅五世嬰時投艱

復脩墜緒一成一旅祀夏配天不失舊物繫帝之德足以繫屬天下而庶子無餘亦宜胙于東土世席休光以及周之末季凡越之人羣居畊鑿服習聲教邇原而上局可食息忘也矧觀其因山之制而遺衣服藏焉歷世推崇或者禎祥神茲顧享皇元受命義周仁洽綏定幅員稽諸版圖貢輸則在昔九州區域止及海內職方之大軼古無倫追惟有夏治格幽明山川鬼神壹是寧謐列聖繼承用弘茲道誕降璽書凡在祀典者命有司肅脩時祭棟宇傾圯官爲繕完若江淞所理聖王之祀宜莫先會稽焉戊申歲土荇饑疾厲仍臻民多流殍臣某以季冬來領郡事慨然曰古者二千石期以共理當爲民省憂吾其敢怠忽明年春白于宰臣凡荒政若干事旣得請還謁祠下周視梁橈風雨歎壓蔽冕弗治丹雘漫漶先是宋政和間卽廟爲觀邇年更爲寺歲侵視蔭百廢莫興乃首議復廟田之私質于民者以贍衆鳩工庀具傭役惟時鉏荒斧堅民士競勸醵石以楹陶甃以甃庭觀嚴敞殿廡翼衛若帝臨止川谷貴輝以帥府命給中統楮幣二百七十一定有奇是役之興庶幾乎知成民

而後致力於神者矣竊惟帝之平水土也九賦既均又曰六府三事以示天下萬世治道之本獨洪範九疇未嘗爲虞帝敷陳其說後千有餘年箕子

始以爲武王告使箕子蒙難而不獲信其志又無武王者興則九疇將遂堙而無傳乎自夏歷商孰傳之而至箕子其事遠莫可考世知帝功與天地並而洪範九疇鮮有能研精理奧究諸力行者使其書徒以言語傳漢儒旁撫庶徵推致五行其言非不較著明甚而先王綜理天人之要亦已微矣八卦九疇道相經緯天所以畀聖人者豈偶然哉聖上續承大寶丕建皇極中外大臣務肩忠藎謨協贊襄蓋將絜斯世而躋之三五之盛神人具孚歲則順成慶浹華裔惟帝妥靈茲土嘉猷德馨亦永求億萬年無斁臣謹稽首再拜而詩之其詩曰
 溯河之東有山鬱蒼鎮于南土夷視崇岡昔帝會同圭璧斯皇翺其颺馭若帝陟方若彼橋山弓劍是截維是橫流潰潰懷裏燥川靜谷成賦定壇帝躬菲惡俾民樂康鑄鼎象列謨訓範防功加九有道尊百王世嚴秩祀登薦肅將牧臣有惕顧視榛荒乃堂乃構邃宇周墻吉蠲來享雲旒龍章繫帝

贊育時厥雨暘物消疵癘歲誅茨梁永佑皇圖儲慶發祥即山勒銘德遠彌光

漢番君廟碑

元明善

饒舊有番君廟范文正公爲守時改作於州治西北距今蓋三百年廟日以壞延祐四年三山王君都中爲守乃重作之廟旁又作芝山道院館道士以爲廟守番君廟者祀漢長沙吳文王芮也方秦毒虐天下秦吏亦乘而毒虐其民存者驚然咸思覆秦殺吏獨番陽令得江湖間民心號曰番君及諸侯兵起遣梅將軍鉞助漢入關得王長沙功著漢令然番人奚有王之功高哉徒知今之德我而已後雖去而他都世世不忘廟而祠之尸而祝之此民之心也此文正公之所爲改作也王君忠信而說禮連治大郡皆著能聲今守饒又能跡前賢所爲以爲治安知今日所思者他日不以思王君哉廟成圖之以寄郡人玄教嗣師吳真人曰此真人昔嘗勸我者今成矣廟當有記真人屬筆於明善遂作漢番君廟碑其頌曰
 翼翼新廟有寢有堂薦我溪毛奠我酒漿靈舞靈歌冀其來享誰繫君駒芝山之隅誰維君舟番水

之洲君不來遊增我百憂靈風清淒陰雲冥迷彷彿君旗導以兩螭君其假思使我心夷君既醉止錫我繁祉庾有稻粱倉有絲枲飽暖而嬉瘦癯不起太守作廟從民攸好春而有祈秋而有報猗千萬年君子是效

侯府君夫人李氏祠堂碑 郭松年

夫人姓李氏北燕縉山人生有淑質既長婉婉聰從不學而能父母鍾愛之擇其婉以歸邑人侯氏之子士溫侯氏大姓世雄鄉里而士溫亦賢子弟號衣冠族遼金以來蟬聯名宦不絕著稱雲朔間夫人始入門其家人上下目其容止閑雅皆悅以相賀自是閨門肅穆雍如也生二子曰進曰慶夫年二十有四而士溫卒居憂哀毀踰禮既免喪事長撫幼愈益恭勤不少怠親黨憐其年少瑩獨勸改適則曰人之所以爲人以其有禮義也吾一婦人而事二夫豈禮義乎哉因以死自誓不失節志竟莫奪聞者歎美之貞祐初金政寢衰皇元太祖肇基王業義旗南指屢敗金兵金主畏徧徙都汴以避其鋒驅士民搶攘南渡夫人携幼孤裹糗從之草行露宿未嘗汚強暴虧婦節既渡河寓

居宿州雖流離頓挫顛沛造次擇師友教養二子不輟二子亦穎悟絕人能動心忍性卓卓自樹立既而進以吏事明敏大爲宗室完顏公所知公事行樞密院事於宿審其可付重事表授下邳元帥府經歷官佩銀符凡府之謀畫教條與夫升黜守戰賞罰之用皆先事應機而辦以功累遷保靜軍節度副使癸巳之變總戎淮海沒王事一子曰珙慶驍勇善騎射由武選仕宰相以其才堪將帥起行間擢萬夫長金季朝廷以北兵方張慮宋人乘釁襲我腹背受敵命慶以本軍戍蜀漢遇敵戰死一子曰瑛甲午歲金亡宿境大飢人相食夫人與孤孫珙瑛瑛瀕死者數四嘆曰始吾南渡與二子俱今皆死國難惴惴殘喘亦何所惜但念侯氏一門不絕如綫重遭荼毒吾何敢不力適歲饑乏食宋人船米數萬石濟宿民且誘之完顏公以國破君亡外無虀蜉蝣蠅子之援遂款附人賴以生范陽人張子良素居公麾下爲裨將公死子良雅不屬宋且念桑梓頗形於言色宋江淮大都督余玠覺其意陳兵脅宿民悉內徙泗州子良愈不自安皇元革命遂舉城來歸朝廷以爲京東行省仍領歸

德府總管府事侯氏從而家焉某年月日夫人薨沐易服召珌瑛立床下戒之曰吾自歸汝家七十年矣遭世多虞備嘗艱苦汝所知也子死國難孫克樹立今年近期願死無所恨脩身齊家汝宜勉之語絕捫肱而卧遂卒享年九十以某年月日葬于睢陽大陳村之別墅夫人慈祥樂易接下以仁事上以禮再遭變故臨難不苟雖白刃在前未嘗怖悼失度少變其節及二子貴顯分旌節握兵符光昭門楣無一毫驕泰色是皆烈丈夫之所難能而夫人處之裕如加以安樂壽考及見其孫珌瑛力學爲儒佐大府縻好爵聲光洋溢享甘旨之養不以疾終天之報施善人爲何如也今上初即位方以孝治天下將一變衰俗以復乎古而貴近舉是以聞上嘉其貞節許其家立祠奉祀祠宜有碑勅臣松年爲之銘銘曰

天地定位綱常以分女不再醮禮具成文倚嗟夫人有猷有守爰從弱齡喪其嘉耦瑩然弔影將彼二雛啼寒號飢其志弗渝鷄鳴膠膠不替風雨栢舟搖搖載罹寒暑金德既衰大駕南巡伯仲聯翩以登要津伯也剖符仲也秉鉞偕歿王事偕有休

烈夫人之德夫人之教粵侯一門兩全忠孝神元撫運景命惟新亦有孝孫侍于夫人敬敬林鳥受哺于子售其功德孝孫之似天錫眉壽降福孔多原始要終其樂如何堂古之制享時之祭勒此銘章以訊來裔

光州固始縣南嶽廟碑

馬祖常

五嶽真五方之地而各神於其人風雨日月之交有年穀之順成民物之疵癘焉南嶽祝融之墟距固始記里二千然皆古楚封域是其神必靈於一方無疑也神而靈能變化佐天地主宰象形流行蕩摩又豈闕於一隅哉傳有曰山澤通氣氣塊比旁礪扶輿充兩間者大而不可以擬言衆人狹中而咸私其鄉神則周不通也神而通則雖廟祀於他邦亦宜哉予嘗被命代祠衡嶽且辱宗伯之職矣知典禮咸秩無文嶽瀆上之所謁吉有事者也僭有厲禁非民之所得禮也國家以仁治天下示民大同斥雕譁而不用凡山林丘陵墳衍之神能福於人鄉人得祠之俾或禱而得年穀焉得無疵癘焉茲亦上之所願推施於下者不禁也地又匪天子歲時遣使之位禱又不大爽於禮禁廟無煩

官司而民樂相之居民上者又忍不因其俗而順悅之乎是三者皆應記也廟事有成悉汝南民李聚之力鳩材庀徒百工並興富者入貲寒者秦技蓋聚當病若有物憑之者自言爾作廟則愈今聚年七十矣衣結躡屨北走京師繪廟之圖介昭功萬戶揔使府副使劉文秉御史臺管勾王珪拜馬祖常丐文歸而刻諸廟中載考廟屋爲閭者五間爲廡者二十間爲後殿者三間爲門者爲別室者大小凡若干間皆象神儀於其中外鑿二池瀦水植蓮客來游者憩息有亭東爲石碣周爲繚垣對樹嘉木合陰成列已蔚然而稱神棲矣固始吾州之屬邑也父老子弟吾之所敬愛者也既來請文夫何讓焉廼爲詩以侑邑人迎送神之詞云信民生大平之樂愷也詩曰

南山隣兮與雲雨我田兮賴我神君神君降兮水渚愷駉羅兮夾以斧威不祥兮無疵癘順年穀兮吾食汝吾食汝兮何報鼓以牲兮蘋蘩來連舞兮樂子廟翼翼兮子趨載擊鼓兮問年統盈嘯兮休盈田富壽愷兮衆咸熙自今茲兮樂民時維茲邑兮孔休神福汝兮多來牟汜布濩兮霑四海充無

垠兮神咸在

漢濟南伏生祠堂碑

張起巖

暴秦焚滅經籍欲愚黔首黔首固未可愚祇自愚以速滅亡而經籍之在人心者如日月之揭乎天固不可得而滅也噫秦灰已冷漢策聿新孰謂禍難散亡之餘而有伏生巋然久存獨能壽遺經於胷臆以傳來學而新生民耳目哉是蓋天相斯人畀之以九十之年而之所以託之者有在也濟南鄒平縣治東北十餘里號伏生鄉伏生之墓在焉即墓所有祠歲久弊漏縣尹大寧曹明叔視事之歲躬拜祠下顧瞻徘徊瞻先賢之所藏仰遺像之有託慨然興懷營脩完飾輪奐一新率邑人士與凡在官者具牲醴以祀復專其子憲來請曰願有述起巖緬惟先生之有功於斯文天下所共知後世論次其功贈乘氏伯號曰大儒從享孔廟天下通祀唯鄒平以其鄉獲私展其敬既別祠縣學又即墓建祠其趨向可知也今曹尹復能崇墓葺祠俾邑人益知有以景行前哲而進于學于以化民成俗是真能舉其職矣起巖齊產也聞其請故不敢辭既書其事因附所見俾來者有攷仍繫以銘

按漢儒林傳伏生名勝爲秦博士壁藏書以避禁兵後亡數十篇獨以二十九篇教子齊魯文帝欲召時已年九十餘老不能行詔掌故晁錯往受之衛宏云伏生老不能正言言不可曉使其女傳言教錯孔安國書序但云失其本經口以傳授藝文志尚書二十九卷乃其所授者漢儒謂之今文隋經籍志乃云伏生口傳二十八篇作書傳四十一篇以授同郡張生張授千乘歐陽生生授兒寬寬授歐陽之子世傳至曾孫高謂之歐陽學又張生傳夏侯都尉有大小夏侯學宋葉夢得以書出伏生者二十三篇傳歐陽欽崇文摠目尚書大傳三卷爲伏勝撰晁氏以爲勝終之後歐陽生張生各誦所聞特撰大義名之曰傳其說互有不同要之今文尚書出於伏生者則一也先生爲秦博士秦坑儒無所施其學其學至漢始傳然則先生之學旣施於漢而名以顯於後世故余不繫之秦而繫之漢題曰漢齊南伏先生祠碑云銘曰

於惟先生始焉其屯終焉則亨獨抱遺經以淑後人以慰幽貞行法俟命天錫耄年庸待治平竟以所授列于學官其道大明書以人傳人以書顯垂

萬世名稽古之力斯文與俱茲 榮從祀孔廟偏于寰區罔不敬承矧茲梁鄒鄉墓攸在礪世作程沉沉玄扃體鬼所安祠以妥靈茂宰尚賢有壞必葺適觀厥成于鄉于學祀享相望閱千百齡穹碑有銘被之弦歌用脩爾牲

國朝文類卷第二十

國朝文類卷第二十一

碑文

中書左丞李公家廟碑

姚燧

燧嘗觀人臣私廟之祭易乎古而難於今三代不論也漢之時功臣侯者土地人民傳及子孫故嗣侯得以致隆數于其祖考世世無有所殺後封功臣皆虛邑無有土地人民子孫或官卑力微往往不能爲廟與雖爲廟以記曰父爲大夫子爲士葬以大夫祭以士祭既用生者之祿勢有必不能致隆者姑借先宋氏言之如文潞國作廟洛西其先未嘗將相也顧受祭將相潞國嘗將相者其及子甫惟得祭以大夫祿是於不爲將相者致隆其真爲將相者復加殺也如斯者幾何人哉惟呂正獻惠穆於文靖范忠宣恭獻於文正世其將相者史冊二百年間纔十三見事亦曠世而希有者也然自中允以來漢人父子將相者故丞相史忠武公與今資善大夫中書左丞贈銀青榮祿大夫平章政事謚武愍公二家重輝襲芳震耀一時豈獨爲之子者信敬於昭昭厥考亦足以慰靈於冥冥矣惟李氏家隴西成紀者實秦將信諸孫漢至六朝

門閥甚峻惟與崔盧鄭氏姻不連他族唐李王西夏甚威強雖宋金嘗加兵終莫能服我

太祖始平之其宗有守兀納城者獨戰死不下子惟忠尚少求從父死爲今分土淄州諸侯王所得於公爲考後以金符監淄州有子十三人公次居四王妃愛其穎異嘗子之在先朝故事凡諸侯王各以其府一官入參決尚書事公代其兄爲之李璵爲逆有迹淄州君獨從公馳聞璵繫闔門獄中璵誅得出上盡賜償所亡失授公淄萊路奧魯總管後改宣武將軍益都淄萊路新軍萬戶與城吏寨圍呂文煥襄陽四年而下之加明威將軍虎符丞相伯顏南征宋兵戍郢十萬城西郢鎮戰艦絕隘爲陣我舟不可越乃渠黃灣拖舟泛藤湖以出唐港棄郢去留公後拒敗其追兵行拔新城沙洋下復破夏貴陽邏口下鄂漢陽從故丞相阿里公時以左丞戰荊口禽高世傑下岳進阮沙市下荆南傳檄歸峽辰沅靖澧常德諸州皆下之又徙鎮常德左丞徇地湖南丞相兵及瀾西以地遠援疏詔公與宋都統張茂實呂師夔闢都元帥府江右公爲左副都元帥破劉槃軍下隆興禽熊飛

建昌撫瑞吉賴與廣閩諸州皆下會宋幼主出降其將相張世傑陳宜中挾益王昀衛王昺浮海趨福立益王元以景炎閩廣諸州應者十五郡縣豪傑亦舉起兵公出定反地大破吳淦軍十萬南豐淦走如張文虎復合兵十萬又破之兜港伏屍三十里淦走合其相文天祥瑞金又大破之天祥走據汀別將孔道窮追併破趙孟潛軍復其州而還隆興守帥觀利巨室罪以陰與賊連已誅夷百三十家公還白其非辜出其未盡誅者獄中帥府改宣慰司加昭勇大將軍同知江西宣慰司事尋加鎮國上將軍福建宣慰使又敗江西宣慰使天祥復潯汀行收兵出興國又擊走之追四百里及之空坑散降其衆廿餘萬禽趙時賞以下文武將吏數百人拜參知政事行中書省江西益王祖廟以端宗世傑復立衛王元以祥興移柵海中崖山近去廣治四百里授蒙古漢軍都元帥經畧廣東進復梅循英德與廣之清遠走王道夫擊凌震海上獲船三百艘禽將吏宋邁以下二百人又破其餘軍焚塘江淮省亦遣都元帥張弘範至自漳與共圍崖山勢計窮蹙度不能國資政陸秀夫抱衛王蹈

海死獲其金璽其將吏死焚溺者十萬餘人翟國秀凌震皆降世傑遁去風壞舟死海凌港南海平朝京師上勞苦之其將佐與錫宴者二百功陞者千授資善大夫中書左丞移省荆湖凡虜男女奴鬻之者皆罪而正之常德辰澧沅靖五州大荒民至易子以糴爲發廩賑之所活爲口亡慮十萬計征占城詔使給糧仗造舟海南取得其宜黎儋之民勸趨之疾還詔從皇子鎮南王征交趾敗其兵天長府其王遂舉國航海將舟師追之敗諸洋中獲海艦三百始公策城天長儲穀待賊斂衆議不果盛夏軍士疾作張濂官管遽議旋軍賊躡敗吾後拒王以公殿賊閉永平關傳樂弩矢射公貫膝負創奪關出境以毒發薨思明州年止五十最其平生小大百戰下城邑百有五爲戶三百萬嗚呼其亦勤已後薨七年而贈官賜諡封公之命始下王音仁煦思重書棺人臣獲此哀榮極矣公雖不可作已安知其不肉骨九京邪公諱恒字德卿自號長白篤孝純至潯州君卒方擊兩王閩廣潯州君顯言我死必無計吾兒使會喪縱敵南海平始克衛哀摧慟夔絕且 謂所從曰爲我語諸昆弟妻

予吾不得以時喪先公既抱恨以終天今復棄養太夫人而身先朝露於是遐夷吾目不暇下泉矣其謹事之夫人王氏視分上諸侯王之妃姑也計至夫人祕不敢聞之姑惟發哀私室公則再見夢太夫人曰兒今死戰日南矣太夫人泣言吾再夢如是豈誠然耶夫人始情告曰婦無以安君姑氏心也覆是久矣始哭服喪嗚呼死而精魂猶惓惓其親可哀也已可哀也已予二人世安以監廣州從朝京師授新軍萬戶同知江西宣慰司事再嗣公益都淄萊本軍萬戶後以正議大夫仍將本軍僉江西行中書省事再陞中奉大夫參知政事行尚書省江西尚書省罷今以上官參知政事行中書省仍江西嗚呼六官而三踐公武已可見其才之無量乎職者自其既相亦解兵其弟世雄以宣武將軍將之乃作河洪之詩使歌以祀公其辭曰

李氏之在與水細大河洪姑臧有夏而王越三年傳歷既長極崇而騰亦天之道日月作矣衆星匿耀王孫始卑徂東自西淄水幽幽東楚之流曰位不豐猶監一州有蠹吾民有梟吾土吾力不能

天子肆汝從父奔告帝嘉爲心廼陟潛沉寢向用公決決漢水南紀所恃爲池襄陽金湯陸公將萬夫長圍四禩而竟下之岷江失藩沿流列城振落摧乾至莫難一文軌判裂萬里收功九重授策維是武庚狂志復殷爵人號年大蠹既闔終兄弟及公膺奮擊與閩四年崖山翦克血其鱷鯢南海無波廐馬笥衣其賚如何帝曰汝烈宜置左相授兵而予西護湖廣公拜稽首天子萬年帝德聖神臣何力焉湖廣聽命壤三千里陰翕陽施賞刑自已及兵占城轉粟黎儋歸佐皇子致討日南不測風洋冒履而三由淄而漢由江而海其涉日深蜚聲日大蕞爾南夷曰尺箠笞捫勝者家輕於出危賊策我師不能炎暑敦弓綿力犀甲敗雨避來弗迎邀歸以爭既犇先偏左廣亦傾孰作士氣公殿奮武斬輻短兵援抱鼓鼓格鬪比死冠纓不顛裏轉馬革踐迹文淵維昔馮時皂纛有翩廼今還歸粉篆丹旂北夢悠悠魂魄遠致身移忠維孝其本黼宸思之錄其庸勞寵幽上公可謂曰遭公亡不亡公有良子亦秉國鈞實法實似有嚴作廟遷篋維時神容與耶去此吳之維淄維漢維江維

海其流或枯廟主斯毀何以麗牲樂石哉我太史詩之以侑以歌

元帥張獻武王廟碑

虞集

昔者汝南忠武王起義兵燕南統率豪傑畧定郡縣聲震河朔及歸國朝遂以其兵攻河南既滅金將移師取宋乃摠諸軍以鎮亳疏積水立城戍開田護耕宋人不敢北犯其後淮陽獻武王復統亳州軍以成大功故亳有張氏之廟焉其中廟祠汝南忠武王西廟祠王第八子蔡國忠毅公東廟祠王第九子淮陽獻武王忠武始封蔡國公而薨也賜謚武康又贈推忠宣力翊運功臣太尉儀同三司上柱國獻武之薨也贈銀青榮祿大夫平章政事謚武烈又贈推忠效節翊運功臣太師開府儀同三司上柱國齊國公改謚忠武皇慶元年獻武王之子珪以中書平章政事相

仁宗皇帝於是忠武進太師進封汝南王改賜今謚獻武進封淮陽王加賜保大二字以益其功臣號又改賜今謚禮部以其事下郡縣之有王廟者至治二年珪復入中書歷相

英宗皇帝 今上皇帝於是泰定元年加賜忠武

以開國二字益其功臣號是年天子肇開經筵珪首當勸講明年解機務封蔡國公仍知經筵以病告歸未幾三遣使趣召見上閱其病重煩以政事拜翰林學士承旨仍以蔡國侍經筵朝有大政則就焉有間使來告集曰先王之廟在亳州者庭皆有麗牲之石我忠武及忠毅之勲德則既具刻而銘之矣惟獻武之廟我以忝與國事不暇私顧其家顧未有刻焉因以王之墓誌神道碑家傳授集曰刻文敢以屬子集辭不獲則對曰昔嘗忝為太史屬固嘗知公家世勲德及進講內殿又執經以從公後者三年矣雖不敏敢不第而書之謹按王諱弘範字仲疇年二十餘其兄順天府總管弘畧上計行朝留攝其府事吏民服其明決時內附甫定蒙古軍所過輒為暴王曰國朝自有法制我奉行之執暴者決以杖入其境無敢犯者順天者故保州以忠武故陞府名後有所避又改今名曰保定云

世祖皇帝中統初置御用局以王為總管三年李壇叛濟南親王哈必赤丞相史天澤帥諸軍討之以王為行軍總管且行請旣帳於忠武忠武曰汝

欲即安耶不與乃命之曰瓊違天必敗汝勉之雖然瓊劇賊也圍城勿避險地險則已無懈心兵必致死者慮其險苟有來犯必赴救可以立功汝必勉之及圍城王軍城西瓊出軍突諸將獨不向王軍王曰吾固受教矣我易受攻而彼不至謂我弗悟也乃築長壘內伏甲而外爲壕開東門以待之夜浚其壕加廣瓊不知也明日果擁飛橋來攻橋不足踰壕軍陷其得陵壕者突入壘門遇伏皆死降兩賊將瓊馨遂敗死論功王最多忠武聞之曰真吾子也或言於朝曰瓊所以得爲亂者盡專兵民之權故也以此間諸侯諸侯果不自安遂罷其子弟之在官者王亦例解總管至元元年弘畧入宿衛上召見其兄弟可代守順天者因念王濟南之功遂佩之金虎符代爲守二年移守大名未上微服行民間察其所患苦見倉吏收民租視所當輸倍蓰怨言載道明日視事首取而治之民大悅是歲大水沒廬舍且盡租稅無從出王輒免之計相以專擅罪王王請入見上前曰臣以爲爲朝廷儲小倉不若儲之大倉非擅免也上曰何說也王曰歲以水不收而必責之民府倉雖實而民死

亡盡明年租將安出活其民使均足於家歲取之有恒非陛下府庫乎此所謂大倉也上曰知體其勿問其監郡有愛魯者先在郡任計吏不當至使自經死僚吏不悅於愛魯發其事幸王不與之則愛魯無援必敗王曰同官也力爲之解不得而愛魯抵罪王亦爲之免官歸鄉里退然閑居不以介意六年大括諸道兵益圍宋襄陽益都兵瓊所教也號勇悍難制度諸帥無足統之者乃以王爲益都淄萊等路行軍萬戶丞相伯顏命王軍鹿門斷糧道絕郢復之援主者曰鹿門有張九漢水以東無慮矣於是王言於丞相曰今規取襄陽周於圍而緩於攻者計待其自斃乎然而夏貴乘江漲送衣糧入城我無禦之者而江陵歸峽行旅休卒道出襄陽南者相繼也寧有自斃之時乎若築城萬山以斷其西立柵灌子灘以絕其東則庶幾斃之道也奏用其言因移王軍萬山令嚴恒無懈意一日出東門與諸將較射大出敵兵猝薄城諸將曰彼衆我寡請嬰城自守王曰嘻我與諸軍在此何事敵至將不戰邪敢言退者死即被甲上馬橫戈立遣偏將李庭當其前他將將六百人攻其

後親率二百騎爲長陣敵之步陣間陳而待王下
 今曰聞鼓皆進擊未鼓勿動敵麾衆入陣我不爲
 動至再且却王曰彼再進再却氣衰矣鼓之前後
 奮擊宋師大敗得奔還者無幾八年築一字城進
 逼襄陽破樊城外郭九年命攻樊城流矢中王肘
 王東創見主帥曰襄在江南樊在江北我陸攻樊
 則襄出舟師來救終不可取若截江道斷救兵水
 陸夾攻之則樊必破而襄亦下矣從之明日復出
 率銳卒先登遂拔樊襄陽降以宋將呂文煥入覲
 上嘉之有錦衣白金寶鞍之賜將校行賞有差十
 一年丞相伯顏帥師伐宋命王率左部諸軍循漢
 江東畧郢而南十二月攻武磯堡取之大兵渡江
 王爲先驅宋相賈似道以其師軍蕪湖其帥孫虎
 臣軍丁家洲王轉戰而前大兵繼之宋師潰王前
 行宣布威德所過降下師次建康上遣使諭丞相
 毋輕敵貪進其少進以待王進說曰聖恩待士卒
 誠厚甚今敵已奪氣亡在旦夕過自迂緩資敵得
 爲計非策也將軍治閫外急緩之宜難制以隄度
 乘破竹之勢取之無遺策矣丞相然之即日馳駟
 至上前面論形勢得旨進師十二年師次瓜洲分

兵立柵奪其要害守之揚州都統姜才者宋之名
 將也所統士有部落種人自爲一軍勁悍善戰至
 是以二萬人出揚子橋都元帥阿木與王當之兩
 軍夾水而陳王以十三騎絕渡衝之陣堅不動王
 引却以誘之其驍將本回紇人鎧伏甚異躍馬出
 衆奮大刀直前趣王王還轡反迎刺之應手頓殪
 馬下立陣者同口驢叫震動天地而敵人亦不覺
 失聲遂潰走追殺轉至城南門斬首萬餘級其自
 相蹂踐與陷壕水溺死幾盡比得入城十無一矣
 王素善禦此戰衆尤服其奇雋焉於是宋將張世
 傑孫虎臣悉其國力率水軍陳於焦山南北將致
 死於我我師合擊之兵支王之一軍橫衝其旁宋
 師大敗宋自是不復能軍矣追奔於圖山之東王
 奪其戰艦八十俘誠以千數上功改亳州萬戶亳
 軍忠武王舊所統也王以爲請遂還之忠武王
 之事

憲宗皇帝嘗賜名曰拔突拔突者國語勇敢無敵
 之名也於是上又以賜王爲名云是年冬丞相伯
 顏次臨安之長安鎮中書左丞董公文炳左出京
 口由海道會之王亦將兵而左師次宋郊丞相遣

使約降宋主宋主幼其大臣難於削號稱臣請以伯姪爲禮往返未決王將命入城數其柄臣之罪而詰之遂屈服竟取降表來上宋亡其主旣歸朝而十三年浙東又叛王力疾討之師次台州遣人持書往諭守將殺使焚書我師怒拔之衆請屠城王不許誅其首禍者而已台民至于今感之明年師還迎拜鎮國上將軍江東宣慰使其民新脫鋒鏑王撫之期月境內稱治十五年王入覲請於

上曰宋主旣降而其將張世傑奉其庶兄益王昀與弟廣王昺南奔旣立昀於閩而卒又立昺於海上宜致討焉乃拜蒙古漢軍都元帥以行陞辭奏曰國朝之制無漢人典蒙古軍者臣漢人恐乖節度猝難成功願得親信蒙古大臣與俱上曰爾憶而父與察罕之事乎其破安豐也汝父留兵守之察罕不肯師旣南而城復爲宋有進退幾失據汝父至不勝其悔恨也由委任不專今豈可使汝復有汝父之悔乎尚能以汝父宣力國家之心爲心則予汝嘉今付汝大事勗之哉面賜錦衣玉帶又辭曰遺囑未息延命海渚奉辭遠征無所事於衣帶也苟以劔甲爲賜則臣也得以仗國威靈率不聽

命者則臣得其職矣上壯之出上方寶劔名甲聽自擇其善者旣拜賜日又諭之曰劔汝副也有不用命者以此處之且行薦李恒爲已貳從之至揚州選將校發水陸之師二萬分道南征以弟弘正爲先鋒戒之曰汝以驍勇見選非私汝也軍法重我不敢以私撓公汝慎之弘正所向克捷王進攻三江寨寨據隘乘高不可近乃連兵環之寨中懼人持滿以待王下令下馬治朝食若將持火者持滿者疑不敢動而他寨不虞也忽麾軍連拔數寨廻擣三江盡拔之至漳州親攻其東門命將佐攻南門西門敵應之乃乘虛入其北門破之鮑浦寨南瀕海王曰陸攻之必走海令弘正圍以騎他將攻其南門又拔之海瀕之郡若潮若惠皆圍結盤互王威聲所至恩信濟之無不內附十六年正月庚戌由潮陽港乘舟入海道至甲子門獲宋斥候將都統劉青顧凱乃知廣王所在辛酉至崖山而他將至外省調至者雖隸所部然儕視不相下有驕蹇意幾敢違其號令王以軍法斬其最甚者一人衆乃懾服聽命時宋人僑居海中環列千餘艘碇之建樓櫓其上隱然堅壁也王引舟師當之然

其地兩山東西對立其北淺舟膠不可進我師由山之東轉而南入大洋始得與之薄又出騎兵斷其汲路燒其宮室而宋益困蹙無所容矣世傑有甥韓在王軍中三使招世傑世傑不從甲戌恒自廣州至舟小更授以二海戰船守北面二月癸未我師將戰或請以礮攻之王曰火起則舟散不如戰也明日四分其軍分處其東南北三面王自將一軍相去里許下令曰宋舟西艤崖山潮至必亟遁急攻之勿令得去聞吾樂作乃戰連令者斬先麾北面一軍乘潮而戰不克李恒等順潮退樂作宋人以爲且宴少懈王舟犯其前南衆繼之王命高構戰樓於舟尾以布障之命軍士負盾而伏之令曰聞金聲起戰先金而妄動者死敵矢傳我舟如蜩伏盾者不動及舟將接鳴金撤障弧弩火石交作頃刻并破七舟宋師大潰宋臣以其主廣王赴水死復其符璽印章張世傑北突吾軍而遁令李恒追至大洋不及世傑走未至交趾風壞舟與將士盡溺死於是嶺海悉平宋無遺孽矣磨崖山之陽紀功而還十月入朝賜宴內殿慰勞良厚然王以瘴癘疾作矣上命尚醫護視日以狀聞遣近

侍臨議用藥曰吾有國事待其謀畫必盡伎速愈之敕衛士坐其門曰九拔都病甚矣非必不可不見者宣詔止之可也疾革沐浴易衣冠俾左右扶至中庭面闕再拜返居室酌酒作樂與親戚賓客爲別遺言毋厚葬甲一襲刀一事足矣明器以陶爲之出南征時賜劔與甲以畀嗣子珪曰汝父以是立功其佩服毋忘語竟遂端坐而薨十七年正月十日也得年四十三上聞之震悼詔京尹給喪事所過郡縣以禮迎送歸葬其鄉之定興縣河內里附葬祖墓而嗣子佩金虎符襲其軍萬戶二十年珪入覲上謂太師月兒魯那演曰此家父子相繼自太祖皇帝以來定中原取江南漢人有勞於國者是爲最張氏史氏俱稱拔都史徒以籌議不如張之百戰立功也所以爵其子孫者豈可與常人同哉遂拜樞密副使行院江淮自是敎歷臺省三十餘年爲國大臣矣王素敏悟喜讀書過目輒識大義歌詩尤慷慨身長七尺備驍如畫機明氣銳言辨捷出勇畧絕人輕財下士拔材於衆已不以爲惠尚氣節敦信義與人交久而益敬剛直自將不

爲勢位所屈雖臨之以威而辭氣洒落理辨愈明
初丞相伯顏至建康大會諸將出庫金行賞而王
後至丞相曰祖宗之法凡以軍事會集罪加後雖
貴近材勇無所貸爾何敢後衆錯愕王徐進曰臨
戰未嘗後受賞恥居先何爲不可丞相爲之俛首
其能片言解疑誤類如此溥錄宋內府金帛行省
都事夾谷士常與馬既而多所遺失或因以誣士
常將就考驗王曰士常名士行義有素何可以此
議之請以本身官爵及家帑保其必不然者其後
誣果明南征時宋文丞相天祥之軍在潮之五坡
嶺弘正掩擊獲之縛文丞相以至樁以戈使拜不
屈王釋之待以客禮吏士或諫王曰敵人之相巨
則不可近王曰忠義人也保無它求其族屬被俘
者悉還之及囚京師聞王薨至爲之垂涕在海上
得宋禮部侍郎鄧光薦禮之於家塾以爲子師嘗
戒其子曰居官律已廉慎則公明自生御衆賞罰
信用則人致力不懷報怨之心怨亦自釋此三言
者皆王素躬行者也凡行軍非對敵未嘗敢妄殺
吏卒有病者必爲親視醫藥不幸死必轉送其家
凡上賜與即分頒士卒麾下有功賞或不時得則

慨然曰人宣力如彼而受抑如彼後或解體將誰
與共功手甚者爲之涕泣陳說不得請不止故人
樂爲之用及爲元帥雖有所刑戮亦必爲之懇惻
申諭仁聞既著薨之日天下莫不傷悼痛惜焉今
蔡國公又嘗謂集曰先王棄世予尚幼不足盡知
其奇謀偉績當時之交游與老校退卒于今畧以
漸盡雖欲廣聞不得及矣至其昭如日星不可泯
滅者則有信史與李王二公之碑在可以參攷者
故凡可知者備書之而不敢畧子一人今蔡國公
也孫六人某官某曾孫子一人某官某集嘗觀於
蜀漢矣諸葛武侯既沒所在求爲立廟後主不聽
百姓私祭之道上或曰宜聽立廟成都又不從步
兵校尉習隆中書郎向充等共言曰周懷召伯甘
棠不伐越思范蠡鑄金存像漢興以來圖形立廟
者多矣亮之烝嘗止於私門廟像莫立非所以存
德念功述追在昔者也宜聽立廟沔陽親屬以時
致祭其故吏欲奉祠者皆限至廟君子以爲禮亦
宜之然則亳州張氏之廟豈徒以著勲臣之世業
哉亦足以表朝廷之盛德凡於腹心股肱爪牙之
臣無所不用其至矣故爲作詩以備樂歌焉其辭

曰

維昔世皇受命自天四征既庭遂開中原粵是南國歷禩三百德在炎燧運往行息百萬我師不亟不遲不殺而神赫其仁威江流湯湯談笑畢渡木顛草偃有仆無拒天子曰嘻士亦勞止時且徂暑其休以俟丞相文武受言敬共息銳養完牛酒旨豐王乃扣閣請具為奏若峻阪馳寧扼其後面上方畧報不踰辰往臨厥都雷颺疾神丞相傳言天子明聖以順來歸請爾民命主幼臣迷勞我行人王曰勿庸罪在柄臣身涉其庭氣直辭決稱臣上表再拜門闕有保其遺奔于海涯延喘湏臾自靖其私王曰不可不告天子不極其征臣不敢止乃錫神劔名甲副之扶瘡排炎廓為清夷膠舟于壑存其餘幾王言三進求訖炎紀橫槩賦詩波濤不驚磨崖勒銘表于鯢鱣功名則有壽位弗逮榮隨哀興業以久大三錫彌尊以啓王封冕舄佩圭盛服在躬維茲毫人服德以世享嘗于廟從王孫于於赫

中有王考右有王兄王之格思庶其在此蒸蒿浮游執感而致維毫士女具曰不然我有井里王爲陌阡我有溝洫王浚王畫王于作邑其城頌頌我藝黍稷亦有稻秔羊豕在牢以庖則盈笱簫鐸鐸享士乃作我迎我享是用不忤昔我父祖荷戈與父從王南征百戰是俱春兩旣濡秋降霜露王來享茲從我父祖維時君子顧瞻咏嗟咨毫庶士孰知其它王有嗣子相我

仁廟正言于庭必扶其要遠深蔽虧群讒切膚帝尚仁孝寧之厥家

英宗赫赫如日斯烈搜奸率庸不假豪驍臨軒待之命過其驅託之股肱恩信渠渠天難諶斯難起倉猝慮深謀逮罪人斯得聖明嗣統車塵徐徐亦惟世臣謹度不渝既寧既好思極求保陳經啓心非法不道申申其居侃侃其容享于帝衷以世師工王廟奕奕視此無數匪毫是私國有恒秩